



Barcelona-i Garcia den küm 6
atema tenangzüktepba yanglu

Ayatollah Ali Khamenei takum
malitsüla: Israel Defence Minister

Naga hungeri alima sapang nung linük tenüng ajungkettsür: CM Dr. Rio

Dimapur, Aami/June 19 (TYO): Regional Centre of Excellence for Music & Performing Arts (RCEMPA), Jotsoma, Kohima nung June 19, 2025 nü TaFMA Excellence Awards 2025 sentong ayongzüka agiogo.

Task Force for Music and Arts (TaFMA) ajanga ayongzükbä sempet agütsüba sentong nungya kentener, artists, actors aser creative professionals nem tetushi agütsü, shirnoki national aser international sapang nung takok tajung nguteta linük nem konang tetushi bener aruja liasü.

Taküm iba sentong ya balaka liasü, kechiaser alimai kanga jangja meteta aliba ken mejemer Dr. A.R. Rahman-i state nem tenla agütsüba grand piano ka saya aser 25th Hornbill Music Festival Coffee Table Book sayaa liasü.

Iba sentong nung akhumdong ka ama Nagaland Chief Minister, Dr. Neiphiu Rio aden aser pa meina ministers, advisors aser tongtipang nisungtem arua liasü.

Dr. Rio-i iba sentong nung jembidang Naga hunger artists temi alima tesem balala nung pei disciplines nung akotetba asoshi tenüngsang agütsü aser parnoki state aser linük asoshi konang tetushi bener arutsüba asoshi tejak tentetba lemsatepa liasü.

Arts, music aser saisapong ajanga alima tesem ajunga nung Naga hunger sobaliba aser yimsü-yimbong prokshitsü aser Nagaland nung aliba lanurtem nem mapa tsütsü maongka agütsütsü nükjidong nung taoba mapang Music Task Force ta nüngja agüja aliba TaFMA ya 2003 küm amenok, ta pai ashi.

TaFMA ajanga Nagaland nung aliba district ajunga nung kenten benjong ayongzüksü telemtetba agiba asoshi pai tenüngsang agütsü.

Dr. Rio-i lanurtem dang maneni state tejak tentetdakja national aser global arena nung pei sempet tajungtiba sayutsü ajungshi aser tajungtiba nung state tenüng wazüka ayutsü ayongzüka liasü.

Dr. Rahman-i sempet agütsüba aser talisa Nagaland nung aliba nüburtem dang

temeim sayuba aser bendanga agütsü yariba asoshi pelaba lemsatepa liasü.

Dr. Rio-i sempet angur ajunga nem tenüngsang agütsü aser state sorkari lenmang balala nungi yaritepsü ta ashi.

Sentong tenzüka TaFMA chairman, Theja Meru-i pela agizükbab o jembidang Chief Minister Dr. Neiphiu Rio dak mangdang tajung akaba aser yaritepba atema pelaba lemsatepa liasü.

Paisa sempet angurtemi meranga inyakba asoshi tenüngsang agütsü aser maneni state asoshi konang bener arutsü ajungshia liasü.

Advisor to the Chief Minister of Nagaland & Chairman IDAN, Abu Metha-i kenten menu ajanga alima sapang nung India tenüng ajungkettsüba asoshi pelaba lemsatepa liasü.

Naga hunger artist temi parnok sempet ajanga Naga hunger otsü ashiba indang pai lemsatep aser tarutsü putu asoshi Nagaland libaliru bendena ayutsü tongtipang ta ashi.

Iba sentong ya ajanga lanurtem nem employment opportunity agütsütsü aser state atema revenue source ka alitsü, ta pai ashi aser nüburtem dang Naga hunger lanur yaria state indang rongsenketzüng tamendak dak tashi itshitsü ayongzüka liasü.

Iba sentong nung Inato Assumi, Palak Chauhan, Temsuinla Longchar, Trance Effect aser Nagaland Madrigal Singers temi ken balala dena liasü.

TaFMA Excellence Awards 2025 ya nisung ter nem agüja liasü. Hito Kiho nem Ultimate Achievers Award sempet agütsü.

Maneni Fifth Note Band, Ruopfuzhano Whiso, Arenla Subong, Lenen Jamir, Tiameren Aier, Nagaland Madrigal Singers, Trance Effect, Bendang Walling, Alobo Naga aser Hito Kiho hunger nem sempet balala agüja liasü.

Sentong tembanga Project Director, TaFMA, Dr. Hovithal Sothu-i melepzüng o jembia liasü.

MLA Achumbemo-i Assam minister den arütsü tebilemtsü lemsatep

Dimapur, Aami/June 19 (TYO): NPF indang Secretary General aser MLA Achumbemo Kikon-i Brehostibarnü AGP tir aser Minister incharge of Agriculture, Excise, Border Affairs and Implementation of Assam Accord, Atul Bora den Gawhati nung par kidang ajurutepa liasü.

Lenir ana ya North East nung regional party tem tashi itshitsü indang jembia liasü.

Minister aser AGP tir Atul Bora aser MLA & NPF tongti zülur Achumbemo Kikon nati akhi mapang nungi NPF aser

AGP tsüngta tesendaktep tajung aliba akangshitsü pangjemtepa liasü.

Iba senden nung MLA Achumbemo-i illegal immigrants tem Merapani Seed Farm li rakzüksü merangba ken o süok aser iba ama inyaksangshi tatok magütsütsü ta shia liasü.

Paisa Assam-Nagaland arütsü nung mangatettep aliba onoka benok aser kati ka temden akumtsüboa Assam aser Nagaland tsüngta arütsü mangatettep tajunglen nungi angatetteptsü indang ayongzüka liasü.

Panel lawyers ya educators, advisors aser counsellors lir



Gauhati High Court, Kohima Bench indang Judge, Justice Y Longkumer den NSLSA nungi ketdangsür aser lawyers tem June 19, 2025 nü Hotel Japfü, Kohima nung tangokba noksa nung angur.

Kohima, Aami/June 19 (TYO): Tajemzükbä jenjang nung alirtem asoshi obendangba tsütsü mezüng teyari agütsür ama teti inyakba panel lawyers tem yagi tangbo Indian legal system nung temelenshi aliba mapang educator, advisors aser counsellors ama tongtipang shilem yimba balala nung agir, ta Judge, Gauhati High Court, Kohima Bench, Justice Y Longkumer-i Brehostibarnü ashi.

Nagaland State Legal Services Authority ajanga Hotel Japfü, Kohima nung June 19, 2025 nü Retainer Lawyers/Panel Lawyers aser Legal Aid Defense Counsel System (LADCS) Lawyers asoshi Criminal Laws tasen: Bharatiya Nyaya Sanhita (BNS), Bharatiya Nagarik Suraksha Sanhita (BNSS), aser Bharatiya Sakshya Adhiniyam (BSA) indang orientation sentong ayongzükbä nung lai iba o ya jembia liasü.

Indian Penal Code, Criminal Procedure code aser Indian Evidence Act melena BNS, BNSS, BSA benokba ajanga Indian Criminal Justice system nung temelenshi tulu lir aser judiciary nung legal fraternities tem angazükba mapang lir, ta lai ashi.

"Item legislative temelenshi ya tema tazütsü melenshiba kistung

masü saka nüburtemi justice system angatetba, ajangshiba nung yimya tasen lir," ta Judge-i ashi.

Legal Services Panel nung tenzüker lawyers tem ya aiben tajemzükbä jenjang nung aliba nüburtem asoshi 'line of access' mezüngbuba amai lir aser parnok shilem tangsa tongtipangba kumogo, ta Longkumer-i ashi.

"Nenoki temelenshi angazüka iba den lirumedema aotsüla, aser ozüng balala melenshiba nung ama yangji timtem aser mejangjaba alitsü akok," ta Judge Longkumer-i ashi.

IPC, CrPC amadoker ozüng tasen angazükba nung timtem jenti lir, saka yamaji inyaktsüsa akumer. Saka ibaji ajanga asangsang nung tali takotetba akumtsü maongka jenbi bener arutsür, ta lai ashi.

Ozüng ka teti melenshia alir aser jenjang balala nung aliba nüburtem temeden wazüka ayutsü ya lawyer tem mapa lir, ta Longkumer-i ashi.

BNS nung aibelenba tanaben lemsashia lir aser temerenshi tasen inoksema lir aser BNS nung temerenshi ama community services aliba indang lai ashi.

BNSS nung victim compensation timba kumtsüba aser bushisüngdangtsü atema mapang tatakzük agüja lir aser

digital evidences amshia kuli tem tasenba kumdaktsür ta ashi.

Tang tensa tasenba nung Panel lawyers mapa ya courtroom telung nung kisüng masü saka educator, advisor aser counsellors ama shilem agiteter, ta lai ashi.

Sentong tenzüka NSLSA Member Secretary, Neiko Akami ajanga pela agizükba o jembidang NSLSA kübok lawyers nem shisa tasen agütsütsü nükjidong nung iba training sentong ayongzükbä ta ashi.

Sentong nung NSLSA Retainer Lawyer, Apila Sangtam menden liasü.

Technical session nung shisalen sayur Nasim Akhtar, Faculty at Judicial Academy, Assam ajanga BNSS nung tongtipang temelenshi tem rateta ashi.

Tanabuba technical session nung Faculty, Judicial Academy, Assam, SP Moitra ajanga BNSS onük nung ajemdaker jembidang 'Cognizance stage to Trial stage; Trial in Absentia under BNSS, 2023; Plea Bargaining under BNSS, 2023; Changes introduced in Commutation of Sentence, Mercy Petition, Withdrawal of Cases; Victim compensation aser Witness Protection amala onüktem awajema jembia liasü.

Nüburtemi anogo 15 tsüngta EPICs angutsü: ECI

Dimapur, Aami/June 19 (TYO): Electors nem Electors Photo Identity Cards (EPICs) tekeraba nung agütsütsü mechi Election Commission of India (ECI) ajanga Standard Operating Procedure (SOP) tasen ka tenzükogo, aser ibaji ajanga enrolment tasen mesüra tang aliba electors nung temelenshi densema electoral rolls nung update asüba EPICs ya anogo 15 tsüngta angutsü, ta ECI sangdong ka ajanga ashi.

Chief Election Commissioner,

Gyanesh Kumar den Election Commissioners Dr. Sukhbir Singh Sandhu aser Dr. Vivek Joshi hungeri ashiba ama electors tem anisüngzüksü mechi ECI ajanga mera balala agia iba sentong tenzüksü.

System tasenba yagi Electoral Registration Officer (ERO) ajanga EPIC generation nungi tenzüka Department of Posts (DoP) ajanga elector nem EPIC agütsüba tashi real-time tracking alitsü.

Stage shia electors nem SMS ajanga osang agütsütsü, anungji

parnok EPICs indang osang mapang shidak nung metettsü.

Iba atema ECI ajanga tawa semzükbä ECINet platform nung IT module balaka renema lir.

IT platform tasenba yagi tang aliba system yanglushia melentsü aser inyakyim nung tiptema alitsü. DoP indang Application Programme Interface (API) ya ECINet den ka kuma lungjemdaktsütsü. Iba inyakyim yagi service delivery tajungba nung agütsütsü aser data security wazüka ayutsü.

Chichung ayong nung awareness & River Ranching sentong agi



June 19 nü Chichung ayong nung awareness aser River Ranching sentong agiba mapang Director, Fisheries & AR, Rongsennungba den ketdangsürtem aser Longsa, Milong, Chubayimkum aser Moalenden yimtsüng nungi yimdaklirtem tangokba noksa nung angur.

Dimapur, Aami/June 19 (TYO): Pradhan Mantri Matsya Sampada Yojana(PMMSY) Scheme 2024-2025 kübok Department of Fisheries and Aquatic Resources, Nagaland-i ayongzüka June 19 nü Chichung ayong Mokokchung nung awareness aser River Ranching sentong ka agiogo, kong ango chanu lakh ka chioka liasü.

Sentong nung o jembiba mapang Director, Fisheries & AR, Rongsennungba-i ashiba agi, resources kechi ali aji amshia state nung fishery sector ajungkettsü aser renloka yoktsü atema department-i

takoba tashi inyakdar.

Paisa, Longsa nung aser kidanger Milong, Chubayimkum aser Moalenden nungertem dang ayong nung shirurtem kümzüka ayutsü ayongzüka liasü. Paisa, village council tem dang entsü koa rezükba mapang ango apuba khenyongi nokdangtsü atema temzüng ozüing tesashi benoktsü ashiba den council-i ayongtem nung ango ya tetsü tebou mapang nungi bentshia aruba anogpuba yimya dang amshia pudaktsütsü melatsü shidangba aser aseni tanü kechi wazük ayur aji asüng atema ta shisem.

Director-isa, iba sentong

takok asoshi village council aser department balala nungi ketdangsürtem aser department nung külem tenzükertemi teyari agütsüba atema kanga pelaba lemsatep.

Sentong nungsa Longsa Village Council tenüng nung Bendang Tatar, Joint Director, SARS, Lipokonen Jamir, Joint Director, Fisheries & AR, Ketusieli Angami, Kazupokba BDO aser Milong, Chubayimkum aser Moalenden village council nungi lenirtemi o tatsütsü jembia liasü. Sentong ya Deputy Director, Fisheries & AR, Dr. Rongsenkumzuk lenisüba nung agia liasü.

Doyang nung awareness den repsema fish ranching sentong agi



Kohima, Aami/June 18 (TYO): Sustainable angopuba inyakym ajungkettsü aser aquatic biodiversity asüngsashitsü atema Nagaland Department of Fisheries & Aquatic Resources-i Zunheboto-Wokha district arrtsü nung Aghakupu (Doyang) ayong nung awareness den repsema-fish ranching sentong ka ayongzüka agiogo.

Iba sentong ya Principal Secretary Y. Kikheto Sema aser Director of Fisheries & Aquatic Resources, Rongsennungba na lenisüba nung agi, shibai indigenous ango tapu balala wazüka ayutsü aser scientific aser responsible resource management ajanga angopurtem libaliro ajungkettsü nüngdakba lemsatepa liasü.

Iba inyakym nung shilem ka ama Nagaland nung anguba anogo Mahseer densema ango tapu balala aika ayong nung chiokogo. Director Rongsennungba-i ashiba agi, ecological balance

asüngsashitsü aser ayong nung fishery tem mapang talangka atema wazüka ayutsü nükjiong

nung iba inyakym benoka inyaker.

Sentong nungsa Principal Secretary Sema-i, "ayong aser tzümpung wazüka ayutsü atema asenokitangazükba agütsütsüla. Mapa inyaksüji tang mapang lir," ta ashi. Paisa, yimya mesüi ango apuba aser shiruru akhaba densema tzü mopung aser arem shiruru yirutsüba inyakym ajak nokdangtsü aser tzü mopung kümzüka ayutsü atema NBCC bangzüng indang nüburtem nem lephsia metetdaksü.

Sema-isa, Doyang ayongküm nung aliba Philimi (Zunheboto) aser Tsungki (Wokha) nungertem dang miim mozü, bomb aser battery amala amshia anogo apuba anentsü asoshi nangzükteptsü ayongzüka liasü. Paisa, anogo entsü koa rezükba mapang anogo apuba khenyongi nokdangtsü aser department-i agütsüba guideline tem sülen tashi anga anidaktsü mepeshia liasü.

Maneni Director Rongsennungba-i, anogo wazüka ayutsü atema jenjang agiba ya tanga tasen masü aser

iba amala mesükba inyakym ya Nagaland kübok tesem balala nung benoka inyakogo, ta ashi. "Asen ayongtem ya Tsüngrem nungi sempet lir, saka ango tali apuba, tzü menentsüba aser angopuba yimya tamajung bentshia ajanga ango kanga kara samayonga odar," ta pai ashi.

Kasa mapang nung Deputy Director Dr. Rongsenkumzuk-i, ango chanu chiokba ya nükjiong tongtibangtibaji masü saka tangazükba agütsütsü aser river ranching inyakym benoka inyaksü atema ajungshitsüji nükjiong tongtibangtiba lir.

Sentong nung Philimi Head GB Vikikhe Assummi-i, iba inyakym wazüka ayutsü atema par yimtsügi jenjang agitsü ta ashiba den Tsungki Village Council Chairman Janthungo Kikon-i, iba sentong ayongzüka katsüba atema sorkar dang kanga pelaba lemsatep.

Sentong ya Joint Director Ketusieli Angami lenisüba nung agi aser Dr Nagato Zhimo-i sarasademer tenzük. Maneni Tsungki Baptist Church Pastor T. Mhao Kikon-i sarasademer sentong tembanga liasü.

Mokokchung nung DLCC senden menogo

Dimapur, Aami/June 19 (TYO): 8buba Economic Census dak sendakba nung District Level Co-ordination Committee (DLCC) senden June 18 nü Deputy Commissioner Conference Room Mokokchung nung menogo. Iba senden ya Deputy Commissioner Mokokchung, Ajit Kumar Verma, IAS lenisüba nung agia liasü.

Senden nung Deputy Commissioner Mokokchung, Ajit Kumar Verma-i, census atema tenüngdakba logistics teyari agütsütsü atema DLCC züngsemtem koda tongtibang iba indang lemsatepa den, economic census indang nüburtem nem tangazükba agütsütsü koda tongtibang iba indang lemsatepa liasü.

District Economic & Statistics Officer Mokokchung, Aoluen-i, 8buba Economic Census ya koda tongtiba indang indang züngsemtem nem metetdaksü, koba advanced Information & Communication Technology (ICT), amshia agitsü aser iba

ajanga mobile devices nung Geo-codes embedded data collection, real time data validation and scrutiny aser monitoring aser supervision atema interactive Management Information System (MIS) dashboards facilitate asütsü.

Paisa, 8buba Economic Census nükjiong metetdaksü, koba goods/services (achitsüba atema masü) yanglutsü mesüra alemtsüba nung sendaka aliba non-agricultural sector dak tongtibangsa rangloker lir, ta ashi.

Maneni iba ajanga crops production aser plantation nung sendaka aliba establishment, public administration, defence, compulsory social security, illegal activities dak sendaka aliba establishment aser territorial lokti tentettem inyakym ayimjemtsü.

Senden nungsa district nung 8buba Economic Census atema nübu, IT personnel, master trainers, supervisor aser enumerator tem bushitetsü nüngdakba indang sensaksema liasü.

Mokokchung nung IOC nungi Rotary junction tashi lenmang yanglushidagi



Mokokchung nung Rotary junction nung IOC tashi lenmang mejungi aliba yanglushiba mapang tangokba noksa.

Mokokchung, Aami/June 19(TYO): Mokokchung nung nüburtem asoshi kanga dang tongtipang lenmang IOC nungi Rotary junction tashi tesem tesem nung lenmang kanga mejungi raksar gari aser nisung senzüsempongertem kanga dang timtema aliba tanü nungi tenzuka taroktem nung lung aser lungsang inokja yanglushidagi.

Iba lenmang mapa ya inyaksü asoshi Northeast Enterprise, Dimapur-i agizüka lir, aser parnoki iba mapa inyaksü asoshi sorkari sen Rs.242.72 lakhs sanction süa lir, saka tang yangluba yabo tzüingluruwa gari aser nisungtem anisüngzüka senzüsempongtsü asoshi yanglushirba dang lir. Anogo Ishika tejaklen Mokokchung Deputy Commissioner-ia anogo Ishika iba lenmang yanglushiba mapang nüburtemi atsühanem akatsü metetdakja liasü.

Northeast Enterprise, Dimapur-i iba mapa sen Rs.242.72 lakhs sanction süa aliba amshia inyakba mapang nung iba lenmang kongshia aliba Ward 5 Arkong, Aongza, Salangtem, Kichutip, aser Sangtemla ward nungi MMC Councillors-temi aser Ongpangkong Kaketshir Mungdang-i mapa timi inyaka

odaktsütsü asoshi achayangtsü.

Tanu iba mapa inyakba tesem nung Aongza Ward nung Councillor Sb.Imtiyapang-i Minister Metsübo Jamir-i iba mapa bener arutettsüsa nentaka inyakba asoshi Minister nem tepelaba metetdakja ashi. Paisa iba lenmang ya Mokokchung nüburtem asoshi tongtipangtiba lenmang ka lir, anungji iba lenmang yanglushiba ajanga Mokokchung kanga dang anisüngzüksü ta ashi.

Rotary Junction nungi IOC tashi lenmang ya kangasa mejungi raksar gari aser nisung senzüsempongertem küm aika kanga dang timtemba ngua Ongpangkong Kaketshir Mungdang-i(OKM) tongpo apua sorkar den aiben dang jembia iba mapa ya tang inyaksüsa mapang agi tonga bentsür aruogo. Tanü iba lenmang yangluba tesem nung Okm

Tir Sb.TongpangMangyang-i iba lenmang ya project nung tetuyuba agüja aliba ama ita 8 tashi nungji shitak inyaker meinyaker itemji mita repringtsü ta ashi.

OKM Tir-isa iba lenmang yangluba mapang nungji ajak ajangzüksü tangatetba nung nüburtemi aremzüka amalitepsüla metetdaksü.

Iran nungi India nunger anir arutsü atema Operation Sindhu tenzük



June 19, 2025 nü Iran nung azünger India nunger kaketshirtem Armenia ajanga New Delhi nung aliba Indira Gandhi International Airport tonga arudang tangokba noksa nung angur. Kashmir Valley nungi kaketshir 110 Iran nungi New Delhi tonga aruogo.

New Delhi, Aami/June 19 (Agencies):

Tang Israel aser Iran na tsünga raraba mapang nung Iran nungi India nungertem anir arutsü atema Bodhbar aonung Ministry of External Affairs (MEA)-i 'Operation Sindhu' tenzükogo.

Bodhbar aonung MEA-i sangdong ka ajanga, "Iran aser Israel na tsünga rara tenzükba sülen tensa tamajungba dang akümba nung ajemdaker India sorkari tesüiba anogo aika Iran nung aliba India nungertem kümzüka alitsü atema telemtetba balala agia inyaksangshia arudar," ta metetdaksü.

Israel-i Iran nung sepaitem aser nuclear facilities aika amakdang sepa tongti ketdangsertem aser nuclear scientists densema aika tepsetogo; tang tashi nungbo nisung kwi asüar official osang mali, ajisüaka Iran nung civilian 239 densema nisung 585 süogo aser nisung 1300 dak tali yiruogo, ta osang angazüker.

Iba sülen Iran-ia missiles 400 dak tali amshia Israel amakdang nisung 24 asü aser noklang aika yiruogo. Iran defense systems ajanga item missiles shilem 90 nokdangteta liasü.

Tang iba ama tensa ka nung Iran nung aliba India sensotem kümzüka anir arutsü atema India sorkari Operation Sindhu

tenzükogo. Iran nung aliba Indian Embassy-i India nunger aika lendong aliba tesemtem nungi tangaleni anir aoba maparen nung yaritepdar.

MEA-i Iran nung aliba India sensotem dang Tehran nung aliba Indian Embassy den emergency helpline ajanga tongteprateptsü aser New Delhi nung MEA-i amenokba 24x7 Control Room den tongtepratepa alitsü metetdaksüogo.

Ministry of External Affairs-isa Iran aser Armenia sorkar napronglai India nunger anir aruba maparen nung yaritepdar atema pelaba lemsatop.

June 17 nü Indian Embassy-i India nunger kaketshir 110 northern Iran nungi Armenia tashi anir otsüba maparen nung yaritep.

India nunger kaketshirtemji gari lenmang ajanga Armenia yimtiba, Yerevan tashi anir aoba sülen Brihostibarnü tayimtsü ajanga New Delhi tonga anir aruogo.

Iran yimtiba Tehran nung aliba Indian Embassy-i Emergency Helpline numbers item ya agütsü- call asütsü atema +98 9128109115, +98 9128109109, WhatsApp atema +98 901044557, +98 9015993320, +91 8086871709, Bandar Abbas yimti atema +98 9177699036, Zahedan yimti atema +98 9396356649 aser

E m a i l - cons.tehran@mea.gov.in agütsü.

Iba dak alia New Delhi nung MEA-i amenokba 24 X 7 Control Room atema helpline numbers ji 800118797 (Toll free), +91-11-23012113, +91-11-23014104, +91-11-23017905 den WhatsApp atema +91-9968291988 aser E m a i l - situationroom@mea.gov.in agütsü.

Brihostibarnü MEA-i, Israel nungi meyipa aruner India nungertem Operation Sindhu kübok India-i anir arutsü atema sorkari telemtetba agiogo, ta metetdaksü.

MEA-i, "Tang Israel aser Iran na tsünga raraba tensa nung ajemdaker Israel toktsür aruner India nungertem anir arutsü atema India sorkari telemtetba agiogo. Israel nungi India-i anir arutsüpurtemji arrtsülen ajanga anir aoba sülen tayimtsü ajanga India tonga anir arutsü," ta metetdaksü.

MEA-isa, "India nunger ajak dang Tel Aviv nung aliba Embassy of India den tongtepratepa (https://www.indembassyisrael.gov.in/indian_national_reg) registration agitsü metetdaksür. Osang tejanga metetnura parnoki Tel Aviv nung Indian Embassy-i amenokba 24/7 Control Room den telephone numbers: +972 54-7520711; +972 54-3278392 aser email: cons1.telaviv@mea.gov.in ajanga tongteprateptsü akok," ta metetdaksü.

"India sorkari iba tensa ya mita dang reprangdar. Bendanglen aliba India sensotem kümzüksü atema India sorkari tongtiibang süa inyaker. Embassy-i maneni sensotem den tongtepratepdar aser akokba tashi yaritepdar," ta metetdaksü.

Operation Sindhu kübok mezüngbuba tayimtsü nungji Brihostibarnü India nunger 110 Armenia yimtiba, Yerevan nungi New Delhi tonga anir aruogo.



June 19, 2025 nü Ludhiana West assembly menden atema by election nung AAP lenir Sanjeev Arora den par kibong züngsemtemi vote agütsüba sülen tangokba noksa nung angur.

Trump-i Pak Army tongti ajurubaji

India atema tamakok: Congress

New Delhi, June 19 (Agencies): US Tir, Donald Trump-i Pakistan Army tongti, Asim Munir jaoka chiyungbaji 'linüktem tsünga tesendaktep' tsütsü India nunger atema tamakok tuluka lir, ta Congress party-i metetdaksü.

Brihostibarnü Congress general secretary in-charge of communications, Jairam Ramesh-i, Field Marshal Asim Munir ya Pakistan sorkar nung tongti masü saka Army Staff tongti lir, ajisüaka Trump-i chiyungtsü atema pa jaok aser tenüsang agütsü, ta ashi.

Tawa kiralongrartemi Pahalgam amakba sülen India-ia Operation Sindoor kübok Pakistan nung kiralongrartem camp aika amak.

Iba sülen alima linüktem nem Pakistan sendokdaksütsü atema India sorkari Operation Sindoor

outreach agia PIndia-i kiralongra anema raraba aser Pakistan-i kiralongra yariba osang sangdonga liasü.

Anogo ka tejaklen India aser Pakistan na den tesendaktep indang jembidang Trump-i, "Ni Pakistan meimer. Modi ya jangratemtsü nisung ka. Yasüng ni pa den jembio. Onoki India nungi Modi den shishilembaba tezüngzüktep yanglutsü," ta metetdakja liasü.

US Tir Trump aser Pakistan Amry tongti na ajurutepdar dak sendakba nung Congress general secretary in-charge of communications Jairam Ramesh-i X ajanga, "Iba ama nisung kati tashishitsü aketba o jembiba sülen kiralongrartem Pahalgam amak. Iba ya India nunger tesendaktep tsütsü tamakok tuluka lir," ta metetdaksü.



June 19, 2025 nü Zagreb, Croatia nung Ato kilonser, Narendra Modi aser Croatia Tir, Zoran Milanovic na senden amendang tangokba noksa nung angur.

State pezü nung assembly menden 5 atema by election junga agiogo

New Delhi, June 19 (Agencies): Brihostibarnü Punjab, West Bengal, Gujarat aser Kerala state tem nung assembly menden pongu atema by election kanga junga agitetogo; West Bengal kübok Kaliganj assembly nungbo nikongdang 5:00 ako tashi nung voters shilem 70 jungnüai vote agütsür liasü, ta election ketdangsertemi metetdaksü.

Brihostibarnep 7:00 ako nung polling tenzük aser nikongdang 6:00 ako tashi nung tembang; tesem kar nung mangatettep tilateri adokba dak alaka election süngjema agitetogo, ta election ketdangsertemisa metetdaksü.

Gujarat, West Bengal aser Punjab shia nung MLA kaka süadokba aser Kerala aser Gujarat na nung MLA kaka anenba ajanga item menden 5 atema election agitsüsa aküm.

Taküm February ita nung West Bengal nung Trinamool Congress (TMC) MLA Nasiruddin Ahmed süadok. Pai azüngtettsüba menden atema agiba by election nung TMC-i Ahmed'er jala Alifa Ahmed toktepdaksü.

Iba menden nung tokteptsü atema BJP-i Ashis Ghosh shim aser Congress nungi Kabil Uddin Shaikh-i toktepa liasü. CPI(M)-i Congress candidate pusem.

Kerala kübok Nilambur constituency nungbo candidates 10 liasü; ruling LDF-i M Swaraj toktepdaksü, Congress-i aniba UDF-i Aryadan Shoukath, TMC state convenor aser independent

candidate P V Anvar aser BJP-i aniba NDA nungi Mohan George nunger densema candidate ajak agi parnok ter liasü.

Gujarat kübok Visavadar constituency aser Kadi constituency na nung BJP, Congress aser Aam Aadmi Party (AAP) party temi menden anaprongla atema candidates shima liasü.

2023 küm December ita nung AAP MLA, Bhupendra Bhayani-i party toktsür BJP nung adenba mapang nungi Visavadar menden ya tazüng liasü.

Taküm February ita nung BJP MLA Karsan Solanki süadokba agi SC candidates atema mekazükja aliba Kadi menden ya azüngteta liasü. Iba menden nung BJP candidate Kirit Patel, Congress candidate Nitin Ranpariya aser AAP lenir Gopal Italia nungeri toktepdaksü.

Assembly menden 182 aliba Gujarat Assembly nung tang BJP MLA 161, Congress MLA 12, AAP MLA 4, Samajwadi MLA ka aser independent MLA ana lir.

Punjab nung taküm January ita nung AAP MLA, Gurpreet Bassi Gogi süadokba agi Ludhiana menden azüngteta liasü. Iba menden nung AAP nungi Sanjeev Arora, Congress nungi Bharat Bhushan Ashu, BJP nungi Jiwan Gupta aser Shiromani Akali Dal (SAD) nungi Parupkar Singh Ghuman nungeri toktepa liasü.

Assembly menden pongu atema agiba by election votes June 23 nü zünga osang sangdongtsü.



TIR YIMYIM YIMOBILEM (EDITORIAL)

DIMAPUR FRIDAY, MAY (AAMI) 20, 2025

Ayongtem shia arudaktsütsüla

Tsüngremi ayong ya ango alitsü atem yanglutsü südi, saka asen lima nungbo ayong nung ango melitetsüsa asenoki mebilemdangi teraksatsüba mapa aika inyaker. Aji oda, ayong nung ango melitetsüsa asenoki inyakbaji asenok anema kari asenok alima nung melitetsüsa inyakba den kasa lir. Atangji, ayong nung ango alitsüsa yanglubajia asenok asoshi chiyongtsü yanglutsüba lir, ajisüaka asenok kanga dang chidiyongdi, morumoru aser tarutsü indang mebilemdangi tanü ajung dang asaa inyakba nisungtem aküm nungji, asenoki ayong nung aliba taküm sangnu ajak asütsüsa miim mozü amshir, bomb apoker aser tangbo ano battery dena amshia ayong nung taliba temang okshia aputsü meranger. Iba jagi ango tulu dang masü saka ango chanu aser entsü dena meshimeshia samatsür. Ibayongji, tanübo asen lima nung akaba ayongtem nung apuba ango temerük aser tajung achitsü melenä tzüim nung apuba angotem tsümartem dang nungi alia achir. Aji oda, külen ak shi aser nashi shi aser külen ango aser entsü ajak tsümalen nungi bener arua achiba agi, asenok anarongdena government mapa nung inyakterem ita sen agi taküm aliba nübortem, ita senji ajunga ita junga mamadangyongi tsümaleni bener yoker. Aji oda, asenoki sen talilabo maatetsüa akok, saka asenoki shisa kaa inyakra, tang asenoki shi, ango aser entsü alia achi dang tangar nem agütsüba sen yabo kümzüktetsü. Iba tangatetba nung, tanü asüngbo asen lima nunga government-i ajungshia nübortem ayonger ayong nung ango tila lakh junga puoka yutsüba osang angashir. Aji oda, yakanü Sema aser Lotha na tsüngda aliba ayong, Doyang nung Nagaland Fisheries & Aquatic Resources department-i ango chanu lakh ka shi puoka yutsüba mapa jagi Naga nungertem dang ayong nung aliba rongsentem apayua tagitsü kuma amshitsü ajungshir. Asen lima nunga Dikhu nung Green Zone Committee tenteta mapang mapang shia ango chanu puoka toktsüba aser ayong nung ango ajak samatsüsa teraksatsüba mapa kecha meinyaktsü asoshi nübortem nem tangatetba agüja inyakba angur. Itemji alima tasen kuma shisa arudaktsüba mapa tajungtem lir. Asenoki angatetsüba kaji asen alidak arem aser yangji aliba shirurutem ajak ya asen meyong, asen rongsen, anungji tagimaa arishia masü saka magimatsü merangtsüla. Ajisüaka, asenoki kanga mebilemdangi arem ajak lepdoka rongsen bushir aser shirurutema ajak samatsütsü meranger amai metsü tsüngkuma memetet, tulu tila aser tetsü tebong kecha mali, tajuruba temang samatsür. Ibayongji, asen lima nung arema mali, shirurua mali aser ayonga tazüng ta asenok chiyongtsü ajakji tsümaleni nungi tsümartemi bener arutsür. Atangji, tanü asüng lanurtem aika dak tangatetba tajung lir, anungji parnokibo ayong nung miim mozü amshia ango pua achitsüabajibo yutsür, ayong nung plastic dena meindoki merüka ayutsü ajungshir. Aji oda, lanurtem aikati meimba agi aser apayuba agi arem shi machir aser süngdonglidong wazüka ayutsü asoshi kanga jangrar. Item tejangrabaji mesamadaktsüi, tang Dikhu aser Doyang nung inyakba amaji, Nagaland nung Tsüngremi yangluja akaba ayongtem ajak tanaben shia arudaktsütsüla. Item ayongtem nungjia kibur yimtsüngtemi Fisheries aser Aquatic department teyari agia ango chanu puoka yutsütsüla aser ango apuba inyakyim kar lateta yutsütsüla. Iba jagi pei yimer ayong nung kodanga ango maremtsü aser ayongji ango purtem ayangdak akümtsü. Ayong yagi yim o yim na aser kin o kin na arrer aser ayongbang nungi ayonglang tashi nung yimtsüng aika ajanga alur, anungji koba yong südirsüaka ayongji yim aika meyong lir. Anungji, yimtsüng ka kijai ayong wazüka ayuba agibo tamakok angutsü, ibaibo kibur ajak longjemer inyaktsüba mapa ka lir. Iba tangatetba nung yimtsüngtemi peisasa rajema pei meyong ayong wazüka ayutsü mulungtettsüla aser Government tsütsüa Fisheries aser Aquatic department-i Nagaland nung ayong shia kiburtem longjemdaktsüli aser tang Doyang nung inyakba ama ango chanu puoka yutsür tangatetba tajung agütsüli ta inyakra, asen lima nunga mapang tatsüka tsüngda ayongtem ajak shia arutsü.

OLEMSABANG

Kübu apuba kolakji sentsüwangshi korang

~ L. Kika Pongener.

Asen mimchir kodang arishi küm nung tain kümdir, kou tanak agi temesung akümtsü, tepo ajunga loktoktsü, tenuk agi jangja mongui akümtsü, tenarong agi junga mangashi-i akümtsü aser shisatsü ramaa amataria akümtsü, o küsa aiben jembitsü, temekok agi pei temang tizüka menoktakettsü, mapang tatsüka nung atong-atonga metsümeshinutsü aser suoshi nung natzü naloktsü. Aji oda, item ajakji arishi küm nung tain akümba temaitsü aser subotsü lir. Tsüngrem o-i ashir, "Küpu apuba kolakji sentsüwangshi korang, aji temeshiba taküm ajanga ajangzüker" (A.Shin-16:31). Tanu putu nungpo aturartema aika kou temesung kuma küpu apur, saka laishiba nung küpu apuba kolakji sentsüwangshi koranga ta shinubaji, kou tanak ajunga temesung kuma arishia alibaji sentsüwangshi korang aser aji meshiteta asüngteta alirtemi dang ajangzüker ta shinur. Atangji, shirnoki taküm nung asüngteta, meshiteta, ochishia, indang-indanga alir, parnoki dang iba sentsüwangshi korangji ajangzükteter. Tsüngremi nubur madak yimsusutsü shimtetertem aser Tsüngrem o nisung na tsüngda o belentsü Putir asütsü shimtetertem nungi shir, nutsüng-nubur tilatiba tashi nem Tsüngremi pei pei shilem teinyaktsü mapa balala nunglokja lir. Aji oda, nisung shia jagi Tsüngremi nungloktsüba mapaji koda inyaker ? Ochishia bendanga agüja inyaker asü ? Mesura pei ajungtsüba, misura pei ajangzüksüba asoshi dang bilema inyaker ?

Tejen putu nung chuba maliba mapang, Putir kati dang Tsüngrem o nisung na tsüngda o belena aser yimsusuba mapa-a inyak aser tarungba tenla-a agüja temenen pongiba mapa-a inyakba putu nung, Tsüngremi Eli Putir asütsü shimtet, saka Eli'er jabaso Hofni aser Finehas tenati tenladak sabangi tenla bener aruba chiyungtsütem nungi, Putir atema tangutsü tim dak nungi talila merumerua rakzüka achi, saka aji Eli-i menokdangi parnok sunutsü sudaktsü (1Samuel-2:12-17). Ano par jabasotemi sentep suki kikümbang nung tenzüker tetsürtem den nuktapangta benshi (1Samuel-2:22). Aji oda, Eli-i pei chirtem mazüoki Tsüngrem jashitsüsa temenen benshidaktsü nungji, Tsüngremi Eli Putir kibong anema azüngashia atakatem. Tsüngremi ashi, "Ajangla kechiba ni lateta yutsüba kü tetepsetba tenlatem nenoki mezüngmeshir ? Kü nubur Israel-puri tenlaba tajungtiba ajak agi nenok sasa teyiraba kümdaktsüba ajanga kü dang nungi tali ne chirtem tushir ? Anungji, Israel Tsüngremi ashir, Ni atangji ne kidong aser nebu kidongi teti kü madang jajatsüla ta ashi; saka tang Kibubai ashir, aji kü dang nungi talangka piladakjang; kechiyong kü akümtsüburtem asoshi ni akümtsübuttsü aser ni sensa-masartem ni hau ta mezüngshitsü. Ajiang ne kidang tambur kata malitsüsa ni ne tepen aser nebu'er kibong tepen leptoktsütsü anogotem arur" (1 Samuel-2:29-31). "Aser ner nisung shiba ni kü meyong tenladak nungi meleptoki yuja ali, pa jagi ne tenuk raksatsütsü aser ne mulungjang jashidaktsütsü; aser ne kidang nungi adokba ajak tebenjem mapang asütsü (Death). Aser ibaji ne jabaso ana Hofni aser Finehas madak ataloktsü" (1 Samuel-2:33-34). Eli Putir kibong dang Tsüngremi azüngashia atakatembaji kanga dang tetsübuttsü-ka aser tansutsü-ka atakadem aser aji shitak atalok.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Israel aser Iran na raraba ya shin o ataloker: Milton Quintanilla



June 14, 2025 nü Iran-i missiles amshia Tel Aviv yimti amakdang poksatsüba kiojen ka Israel security sepaitemi longbanga aliba noksa nung angur.

June 19, 2025: Taoba hopta Israel-i Iran nung sepaitem aser nuclear facilities aika amakdang Iran nung sepai tongti ketdangsertem aser nuclear scientists aika tepsetogo.

Iba sülen Iran-ia missiles amshia Israel amak tenzük.

"Israel aser Iran na tsüngda raratsü indang ya Laishiba nung shinzüka aliba ataloker. Akhidang Persia ta ajaba Iran-i Gog aser Magog tongbang nung Russia den lokteper raratsü ta ainkar Ezekiel-i shinzüka lir," ta CrosswalkHeadlines atema ocet zülutsür aser For Your Soul Podcast ketdangser, Milton Quintanilla-i metetdaksü.

"Khristan ka ama asenoki linük ana nung rara, alima nung rara aser tatembang anogo mapang indang Laishiba nung shia aliba angatettsüji kanga tongtibang," ta pai ashi.

1948 küm nung ang Israel ya linük ka ama nüchiso anguba ya Laishiba nung shinzüka aliba atalokba lir ta aikati bilemer. Yihuda nunger aika Israel limai meyipa arutsü indang Tazüngkunem 30:3; Isaia 43:6; Ezekiel 34:11-13; 36:24; 37:1-14 nung shia lir.

"Alipokli nungi Israel ya tongbang rara ka nung mesüra ka nungbosa nokdaka lir. Laishiba nung Israel nungertemi Ijip, Amalekites, Midian, Moab, Ammon, Filistine, Assyrian, Babylon, Persia mesüra Rom nunger den raraa aruba otsü lir. Khristantem ama asenoki Israel ya Tsüngremi shimtetba kin ta meteter," ta pai metetdaksü.

2023 küm Hamas-i Israel amaktsü hopta ishika dang lia osangbenertem senden ka nung jembidang Israel Ato kilonser Benjamin Netanyahu-i Isaia-i shinba metetdakja 'kenü anogo nungbo Yihuda linük nung rara malitsü mesüra Israel arrtsülen auyaba malitsü', ta jembia liasü.

"Ainkar Isaia-i 'nenok arrtsülen auyaba malitsü aser nenok süngkümtem nung sentsüwangshi alitsü' ta shinzüka alibaji ataloktsü. Longjemer onoki raratsü aser longjemer onoki takok angutsü," ta Benjamin Netanyahu-i jembia liasü.

Netanyahu-isa, "Israel ya taküm alitsü atema tongbang tiyongtsü ka nung lir. Hamas züngsem ajakji asütsü- ali tema aser ali kübok alirtem, Gaza telung nung aser tema nung alir Hamas züngsem ajak asütsü," ta metetdakja liasü.

Kodang Laishiba nung reprangdangdir Israel aser Iran na tsüngda raraba nung ya kecha süngmangtsü mali, kechiyong iba ya akhidang nungi shinzüka aliba ataloker, ta Milton Quintanilla-i metetdaksü.

Aji oda süaka melung süngzüksüsa lir, kechiyong Tsüngremi nangzükba ama Israel atema Tsüngremi tiyongtsüi ia inyaktsü aser tsükchirtem matsüngdang nungi Israel nunger kümzüksü, ta paisa metetdaksü.

"Ajisüaka iba anogo nungji Gog-i Israel anema apusotsü, ta Kibuba Tsüngremi shia lir. Kenü anogo Israel lima nung

menoknok tulu alitsü," ta Ezekiel 38:1-6 nung shia lir.

"Khrista tanaben arutsü mapang mesüra anogoji shingaia meteta mali, anungji Khrista tanaben arutsü anogoji shingaia meshintsüla. Asenok teinyaktsü ajak agi maneni aremzüka alitsüla, kechiyong Laishibai yamai ashir, 'Saka tatem tashi shirnoki aremzükdir parnok kümzüksü'" ta paisa metetdaksü.

Israel Defense Force (IDF)-i, Iran nungeri missiles amshia amakdang Israel nung nisung 8 süogo, ta metetdaksü.

Home Front Command officer, Brig.-Gen. Liron Donnell-i, "Onoki sensotem dang taküm kümzüksü atema alarm ola angashidang functional safe room nung jenoktsü metetdaksüogo," ta metetdaksü.

IDF-isa, tesüiba anogo ishika tsüngda air defense systems ajanga Iran nunger ballistic missiles shilem 80 nungi 90 tashi nokdangteta khazüka yokogo, ta metetdaksü.

Iran ket nung nuclear hadir lira ibaji ajanga takoksa tulu angutsü, ta shia Israel Ato kilonser Benjamin Netanyahu-i, "Asenok tang iba tensa nung aliba ya asenok taküm alitsü atema lir, aser ibaji Israel nung senso ajaki meteta dang lir. Iran nunger ket nung nuclear hadir lira aser ibaji Israel nung aliba yimtitem anema amshira kechi ataloktsüar asenok ajaki meteta dang lir. Iran ket nung missiles 20,000 lira ibaji amokmeren tulu," ta ashi.

Item kuli miimbangtsü atema jail semdangtsü asoshi sorkar ketdangsertemi lawyers aser kibong züngsemtem nem temelaba magütsür. Iba dak alia yimtenren tsütsülen nungi tepuokdak ayur nisung 14 bo samaogo.

Jail nung reshikangshirtem aika tepinbang tashidak, teküp infections, shi tetsü aser tebok ashiba agi timtemdar, ta kasa osang ajanga metetdaksü.

ANOGO ABEN TSÜNGREM DEN

Awaa Oang

Adianutem, ni kūsasa aji joko puogo ta mezüngshir. Saka ni mapa ya inyaker, oda taoba amadoker tejaklen kechi lir itemji asoshi awaa oa inyaker. Filipi 3:13.

Alimai tesüiba mapa agi na arakmoker ta ashir. Na timatemba kibong ka nungi arua lira iba jagi ne taküm nem tetuyuba agütsütsü. Ne sobaliba agi na mejungi amshia lira, iba jagi ne taküm tanü aramoktsü. Ne lanuwa taküm mejungi arua lira, anünga aliba ne taküm iba denji raratepa atemtsü. Alimaji tesüiba mapa agi agidaktsür kechiaser iba yagi tarutsüji mejangjar.

Külen, khristantem nüji nung alir kechiaser Khristai asenok tesüibaji koktetogo, "Tejenbaji süitemogo aser tasenba aruogo (2 Kor. 5:17). Tsüngremi Khristantem temenen tai tokogo aser Pai aji joko mebilemtettsü mulungtetogo (Isa. 43:25). Khristantemi tesüibaji mamadoker saka iba jagi asenok mazüoker mesüra majungshidaktsür. Khristantemi teyimla agi tarungtsü nung rangloker.

Alima nüburi parnoki kechi akoker iba nung rangloker. Khristantemi parnok kechi akümtsü iba nung rangloker. Tanela Temeshi-i parnok Khrista mesüka kümdaktsü ta khristantemi metet. Khristantemi parnok mapa tatem anogo nung Khrista tsüngdang züngdangtsü aser teti tatem maka Tsüngrem den alitsü ta metet. Ochi mashiba ajak ajatsü aser yirua alir süneptsütsü ta khristantemi metet. Satan aser tasüba, tatem nung samatsü ta parnoki metet. Khristan tarutsüji tabensa aser takar iba jagi tesüiba nung kechisa süa aru ajaki atendanger.

Na tesüiba mapa agi ne taküm amokbanga lira, tarutsü kechi sentsüwangshi lir ibaji angutsü Tsüngrem dang ne tenük lapokjang ta shiang aser Paul ama tejakleni awaa aotsü tenzükang.

'Joseph of Egypt' series atema Dallas Jenkins-i Amazon den longjem

June 19, 2025: Dallas aliba tebilemba aliba Jenkins-i Laishiba nung aliba lemsatepogo aser series asemji Yosef, Mosa aser Tenyartem Mapa kaket (The Way of The Chosen) lir.

Project tasenba dang ya Yaküm Orlando nung ChosenCon sentong nung jembidang Dallas Jenkins-i Yosef otsü indang series yanglutsü tejangraba aliba lemsatepa liasü.

Paisa, Tsüngremi Mosa nem ozüng ter magütsüdangyongi küm aika tejaklen Yosef aser tebu Yakob nabo liasü, ta ashi.

"Item otsütem ajanga Mosa nem ozüngtem agütsü aser Mosa otsütem ajanga Yisus Khrista aru. Anungji onoki item ajak indang projects inyakner. Tejen Lai nung aliba projects süaka itemji tatem sabo Yisus projects lir," ta pai ashi.

Item series shiaji episode 8 aliba series asütsü, ta pai ashi.

"Onoki Yakob aser Rachel aser Leah otsütem-a terabo ayimjemtsü aser adianu 12 asoba aser Israel kin 12 akümba indang ayimjemtsü," ta pai ashi.

Dallas Jenkins atema item project ya tatem bangbuba masütsü. Tamalen pai live-action series asem yanglutsü

Nicaragua nung tepuokdak Khristantem kanga reshikangshir

June 19, 2025: Tesüiba küm ishika tejaklen nungi Nicaragua linük nung aliba jail tem nung Khristantem kanga reshikangshir; talisa Sandinista National Liberation Front (SNLF) aser Nicaragua sorkar anema jembirtem kanga reshikangshir, ta International Christian Concern (ICC)-i metetdaksü.

Tamalen Direccion de Auxilio Judicial (DAJ), "El

Chipote" ta ajaba, el Sistema Penitenciario Nacional Jorge Navarro, "La Modelo" ta ajaba aser Sistema Penitenciario de Mujeres, "La Esperanza" ta ajaba jail tem nung Khristantem dak kanga mejungi azükba, tashiyim amshia raksatsüba, amokmerenba mesüra mezüngmeshiba tatalokba aika lir. Item ama reshikangshi ajanga aika temang nung timtem balala adokogo.

Item kuli miimbangtsü atema jail semdangtsü asoshi sorkar ketdangsertemi lawyers aser kibong züngsemtem nem temelaba magütsür. Iba dak alia yimtenren tsütsülen nungi tepuokdak ayur nisung 14 bo samaogo.

Jail nung reshikangshirtem aika tepinbang tashidak, teküp infections, shi tetsü aser tebok ashiba agi timtemdar, ta kasa osang ajanga metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG****Tepbang**

(v) mangutsüsa nübangba (cover the surface with paint)

* Ozü kidang sentsü temerem ajak tanak agi tepbang.

Tepdang

(v) süng agi tesem ka ladangba (block by placing wooden block)

* Yipru aيتدang süngdong tuluka laoa lenmang tepdang.



Tir Yimym

OLONG PAITEP # 7185

1		2		3		4	5			
				6						7
		8								
9				10		11				
			12						13	
						14				
16						17				

TIPIEN

1. Nisung jenti
4. Tsük rudenba
6. Temzüng tesashi
8. S___i
9. Nisung rongnung telemasa
10. Anogoshi
12. Ajanga aor
13. Tsük rizüngdak
14. Tebang nungi adokba
16. Süngdong tatembangtiba
17. Meputep

- (5)

- (5)

- (5)

- (3)

- (3)

- (4)

- (4)

- (3)

- (3)

- (5)

- (5)

LANGTSÜNGLEN

1. Tenük telong
2. Committee dang ajar
3. Yagi ki okdoker
5. Yim lenmang
7. Temoatsü keter meyipa aruba
11. Kanga junga menemba
12. Kenyongi majinü
13. Rong kanga tulu

- (9)

- (5)

- (7)

- (5)

- (9)

- (7)

- (5)

- (5)

OLONG PAITEP # 7184 TELANGZÜBA**TIPIEN :**

1. Tanga, 6. Wara, 7. Rajang,
9. Anük, 10. Jenjang, 11. Alar,
14. Ngashi, 15. Nala, 16. Mechi.

LANGTSÜNGLEN :

2. Anga, 3. Yabang, 4. Tarok,
5. Orak, 8. Ainer, 9. Anema,
10. Jabili, 11. Among, 12. Miim,
13. Anem.

NAI-A YA METETTER MA**ALIMA NUNG MILITARY TASHI TATITIBA 10**

1. United States: Active Military Personnel:- 1,328,000
2. Russia: Active Military Personnel:- 1,320,000
3. China: Active Military Personnel:- 2.035 million
4. India: Active Military Personnel:- 1,455,550
5. South Korea: Active Military Personnel:- 600,000
6. United Kingdom: Active Military Personnel:- 144,400
7. France: Active Military Personnel:- 270,000
8. Japan: Active Military Personnel:- 247,000
9. Turkiye: Active Military Personnel:- 355,200
10. Italy: Active Military Personnel:- 165,500

Tanur asoba anogo nung salem osang den noksa angati adokdaksünöra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimym bureau tem nung agüjang.

Darrang nung sorkar ali bigha 7,853 azüngtettsüogo

Guwahati, Aami/June 19 (Agencies): Assam nung Darrang district administration-i Sipajhar revenue circle kübok Garukhuti nung sorkar ali bigha 7,853 azüngtettsüogo, aser Garukhuti multipurpose agricultural project atema mekazüka aliba ali ozüng alema atsünger alir kibong 2,166 tangaleni anirogo.

Ketdangsürtemi iba tesem nugn aliba nüburtem ya Bodhbarnü kecha tetsükdaksü

makai anina, 2022-23 küm tenzüka iba ali azüngtettsüba sentong ya tembangogo.

District Commissioner Parag Kr Kakaty aser Sipajhar co-district ketdangsürtemi achaayanga taküm iba inyakyim kübok shilem tasembuba aser tatembangbuba takok ngua benoka inyakogo.

Tatembangbuba shilem nung ketdangsürtemi iba tesem nungi kibong 299 anina liasü. 2022-23 küm mezüngbuba shilem benoka

inyakba mapang kibong 1,167 anina liasü.

Administration-isa 2024 küm tanabuba shilem benoka inyakba mapang iba tesem nungi kibong 700 anina liasü.

Iba inyakyim ajanga district-i aluyimtsü atema mekazüka toktsür aliba ali ozüng alema atsünger lia aliba tanaben meyipa agiogo aser kasa mapang nung iba mapa benoka inyakba mapang azütokshi lendong kecha matalok kanga sunepa inyaktetogo.

Manipur nung tesem balala nüngja ozüng alema melenshiba nokdanger

Imphal, Aami/June 19 (Agencies): Manipur nung ozüng alema tesem balala nüngja melenshiba nokdangtsü jenjang agia arudar. Iba inyakyim ya N. Biren Singh-i aniba sorkar mapang tenzüker aser tang Presidential Rule kübok administration-i maneni benoka inyakdar.

Telok kati Moreh nung Meitei nunger yimtsüng ka tenüng melenshitsü merangba osang temai adokba sülen ken o ya ajaki jangja aküm, aser state ajunga nung iba atema süoki ia bilem

tenzüka liasü.

Iba ken o bentettsü atema sorkari "The Manipur Names of Places Act, 2024," agizükogo, koba 2024 küm March 15 nü nungi benoka inyaka arudar. Iba ozüng ajanga Land Resources Department of Manipur nungi temelaba magi-i tesem kecha nüngja magütsütsü mesüra memelenshitsü ta shia lir.

Tesem balala nüngja indang sorkar nem mapangshia metetdaksütsü atema Place Names Committee ka 2023 küm December 19 nü tenteta liasü.

Ketdangsürtemi iba ozüng sülen tashi anga anidaksü tetuyuba agütsüogo. Ozüng nung aibelenertem küm ka nungi asem tashi tepokdaki yoktsü mesüra senchi sen 50,000 nung lakh 2 tashi achitsü.

Sorkar department ajak dang iba ozüng sülen tashi anga anidaksü tetuyuba agütsüogo. Tawa Land Resources Secretary Namoijam Kheda Varta Singh-i, tesem balala nüngjatam kümzüka yua Manipur puti otsü aser sobaliba wazüka ayutsü sorkar bendanga agütsür lir ta ashi.

BJP Assam Pradesh state executive team tasen tentetogo

Assam nung Bharatiya Janata Party (BJP)-i Brehostibarnü state-level ketdangpur aser züngsem tasentem sangdongogo.

Guwahati, Aami/June 19 (Agencies): Assam nung Bharatiya Janata Party (BJP)-i Brehostibarnü state-level ketdangpur aser züngsem tasentem sangdongogo aser iba ajanga taruba assembly election atema renemshiba sayur.

BJP National tir, J.P. Nadda-i agizükba sülen ketdangpur tasentem ya sangdongogo.

Team tasenba nung nisung tapu balala tongtibang mapatem atema shimogo, kong Vice-President, General Secretary, Secretary tem, Treasurer ka, Joint Treasurer, aser office, social media, aser information technology amala tongtibang telentem atema in-charge tem shimba densema lir.

Party-i state kübok Tinsukia, Cachar, Charaideo, Nagaon,

Sivasagar, Hojai, Biswanath, Guwahati, aser Barpeta densema tesem balala nungi Vice-President ter shimogo.

Vice-President tem rongnung lenir tejen Pulak Gohain aser taoba minister Parimal Suklabaidya aser lenir tasen Dr. Jubi Sarma Borpatra nunger densema lir.

Kasa mapang nung Diplu Ranjan Sharma, Padmadhar Das, Satyaranjan Borbora, aser Anup Barman nunger General Secretary mapa abentsü atema Assam kübok tesem balala nungi shimogo.

Party-isa parnok indang organizational structure akangshia Secretary ama nisung trok shimogo, kong lenir tejen aser tasentem densema lir.

Party Treasurer asütsü

Rajkumar Sarma shimogo aser pa den Joint Treasurer asütsü Narayan Deka shimogo.

Subhash Biswas nem Office Secretary mapa agütsüogo aser pai Guwahati nung party indang state headquarters achaayangtsü.

Maneni party-i, Social Media in-charge asütsü Biswajit Khound shim aser IT in-charge asütsü Dr. Mriganka Talukdar shimogo.

Party-isa, otongdar asütsü Kishore Upadhyaya aser Media in-charge mapa abentsü Rupam Goswami shimogo. Anirban Goswami Deputy Office in-charge asütsü.

Assam Chief Minister Himanta Biswa Sarma-i pa indang X handle ajanga ketdangpur tasentem nem tenüngsang agüja liasü.

Rwanda o DR Congo rara tembangtsü mulungteper

Washington, Aami/June 19 (Agencies): Küm aika raraba tatembang kati arutsü atema Rwanda aser Democratic Republic of Congo nungi ketdangsürtemi draft agreement ka yangluogo.

US aser Qatar tetsüngtai ia jembiba ajanga DR Congo anüdoklen rara aliba telok balala tsüngta "disengagement, disarmament and conditional integration" alitsü.

Iba tezüngzüktep nungya tarutsü nung mepetmesü adokba nungi nokdangtsü atema 'joint security mechanism' ka dena lir. Iba yimjung tezüngzüktep nungya taruba hopta meyongnem agütsütsü imlar.

Iba tezüngzüktep yagi ali rongsen peria aliba region nung anüolen linük temi sen billion dollar aika indoktsü lenmang lapoktsütsü akok, kong küm 30 shi rara agi sünger lia aru.

Ajisüaka iba peace deal nung shia aliba nung tasüngdangba aika lir ta ashir.

US State Department ajanga

ashiba agi, technical team temi draft text ya Bodhbarnü renema liasü aser taruba Hokulbarnü US Secretary of State Marco Rubio lia meyongnem agütsüba sentong ka agütsü.

Washington nung linük ana nungi lenirtem tsüngta anogo asem tashi yimtenren, security aser rongsenketzüng indang jembishinüba mapang iba tezüngzüktep ya yanglu, ta sangdong ajanga ashi.

Tang tesüsaba draft agreement ya taoba mapang meyongnem agütsütepa aliba accord nung ajemdaker yanglu ta ashi.

April ita tatemlen Rwanda aser DR Congo tsüngta Washington nung tezüngzüktep ka zülutepa kati ka indang yimden tashi akumtsübotsü nangzüik aser anogo ishika tsüngta yimjung tezüngzüktep atema draft ka yanglua liasü.

Rwanda-i yarir südi ta amanga aliba M23 rebels temi küm tetenzüklen DR Congo anüdoklen ali rongsen peria aliba

alinük tuluka agiba sülen küm aika rara aruba tesashiba akum.

Rwanda-i M23 ya meyarir ta ashir aser region nung par mitkar aliba ya 1994 Rwanda genocides den sendaktepa aliba ethnic Hutus timba sür aliba FDLR ama telungpur telok ajanga timtem agütsüba nung defensive measure ka lir ta ashir.

M23 yagi January ita tatemlen Goma amokbang aser iba sülen Bukavu agi aser iba sülen regions nung aliba sorkar ki o jen par küboki aitdaksü.

Sorkar anemer temi tashiyim amshiba mapang nisung meyirijang aika tepsetogo aser civilian meyirijang aika pei ki yutsür tesem balala nung prokshia lir.

Alinük rakzükdaksüba sülen Kinshasa nung aliba sorkari US dang teyari meshi aser iba melen critical minerals agizükdaksütsü mela. DR Congo anüdoklen coltan aser electronic industries nung tongtipang osettem peria lir.

Ayatollah Ali Khamenei takum malitsüla: Israel Defence Minister

Tel Aviv, Aami/June 19 (Agencies): Iran nungeri missile amshia Israel nunger mozüki ka amakba sülen Brehostibarnü Israel Defence Minister-i Iran indang Supreme Leader Ayatollah Ali Khamenei takum malitsüla, ta tekumdangtsü ashi.

Iran-i missile amshia Israel south tsütsü Beersheba yimti nung aliba Soroka Hospital amakba sülen iba sangdong ya agüja liasü.

Tel Aviv anasa Holon nung osangbener den jembidang Defence Minister Israel Katz-i, "Khamenei-i yimjak nung pai Israel samatsüner ta sangdonga lir - mozüki tem nung amaktsü pai totuyuba agütsü. Israel linük samatsütsü ya pa indang nükjiding ka ama pai züngshir," ta ashi.

"Khamenei ama dictator, shiba Iran ama linük ka nung tekolakba lir aser Israel samatsütsü pa indang mission kumdaksü, maneni lidaktsüla masü," ta Katz-i ashi.

"IDF nem totuyuba agütsüogo aser nükjiding ajunga nung takok angutsü mechi, iba nisungba ya khenyongi melidaktsütsüla."

Israel-i Khamenei tepsettsü sentong aliba Tir Donald Trump-i nokdang ta taoba hopta US ketdangsür temi ashiba sülen Iran lenir indang-indanga amokmerenba ya angashir. Mapang tatsüka lir Trump-i tang asoshi pa dak tenük yoktsü sentong mali ta ashi.

Israel Ato Kilonser Benjamin Netanyahu-ia mozüki amakba kanga sashia aitsüogo aser Iran-i taa agitsü ta tekumdangtsü ashi. "Tanep Iran indang kiralongrar dictators ajanga linük tiyong nung Soroka

Hospital aser civilian dak missiles khaloktsü. Asenoki Tehran nung aliba yimsüsür nem iba taa menokdaksütsü," ta Netanyahu-i social media X nung ashi.

Iba mozüki nung Iranian ballistic missiles ter dak tema khalokja mi adok. Nisung 40 shi yiru. Ano Tel Aviv anasa jila tem nunga amakba osang lir.

Ajisüaka Iran-i health facility masü Israel mitkar aser itdangiter amenoka aliba

tesemtem nung tenük yoker amak ta ashi.

Linük ana tsüngta missiles aser drones amshia linük kati ka dak amak tenzüker anogo tenet buba nung iba ya ataloker, aser region nung rara tuluba akumtsü tetsübo nung lir. Kasa mapang iba rara nung Washington ya Israel tsütsü adentsü asü masü ta alimai bilema lir.

Trump-i Khamenei dang "unconditional surrender" akhangba pai magizüker.

SANGDONGER

Mr. Longkumpo S/o Late Takutoshi Longkhum, pai Longkhum Riju indang tiyazü ken-o menaba yong angatetteptsü jaok, saka jena oadoker mangur/marur. Anungji kari ngura item agüja aliba numbertem ajanga tongtepratepdaksüner.

Contact No. 9612826004 / 8575558979 / 9436439750

1. Imenba

2. Mayangmeren

3. Tongpangyimfo

Israel-i Iran amakba Putin aser Xi Jinping nati aitsür

Moscow, Aami/June 19 (Agencies): Russia Tir Vladimir Putin aser China Tir Xi Jinping tsüngta phone ajanga jembiba sülen Israel aser Iran tsüngta rara tenzüka aliba anentsü ayongzüka liasü.

Israel-i Iran amakba nung shilem magitsü ta linük ana den tokteper United States-i o lepdang magütsütetba sülen Brehostibarnü tir ana yagi lungjemer iba mepetmesü atema jembia liasü.

Xi-i "major powers" dang rara ajemdaksütsü ayongzüik, koba Washington athishiba alitsü. Tehran den strategic cooperation pact aliba linük, Russia-ia US dang Iran mamaktsü ajungshir ta ashi.

Lenir ana phone ajanga jembiba sülen Kermlin aide Yuri Ushakov-i osangbener den jembidang Putin aser Xi nati Israel inyakyim tashi agi aitsü, koba UN Charter aser danga international law nung aibelenba lir, ta ashi.

Tang tensa aser Iran indang nuclear sendong dak sendakba nung military solution mali aser yimtenren ajanga dang tangatettep kati arutsü ta lenir anaprongi amanger, ta pai ashi.

Tena jembidang Putin-i iba mangatettep nung tetsüngtai aitsü nenshia ashi aser Xi-ia mulunga agizük, ta Ushakov-i ashi.

Xi-ia telok ajak, talisa Israel dang rara tuluba makumtsü



OFFICE OF THE

Dimapur Langpangkong Senso Telungjem

Dimapur - 797112 • Nagaland

Nukjiding : "Telungjem Ajanga Tejakhoni"

TENÜNGSANG AGÜTSÜR



Yaongyimsen nunger tebu tedi asür N.T.Longkumer'er jabaso Wabong **Aliawati Longkumer** 1994 küm nungi External Affairs Ministry, Govt of India kübok alima tesem balala nung Indian Foreign Mission nung inyaka arur, tang Indian Embassy Paraguay nung Charge d'Affaires ad Interim inyaka lia Democratic People's Republic of Korea nung India nungi Ambassador inyaktsü shimtetba asoshi kanga nümadanga bilemer aser pa nem Langpangkong sensosanger ajaki tenüngsang tulu agütsür.

Pa ya tamalena Consulate General of India ,Guangzhou, China nung Consul inyaka liasü. Pai Spanish oshi dena jembiteter. Pa kinungtsüa Yaongyimsentsür Wt.Temjensangla lir aser tena nem jala ka aser jabaso ka ta moaja lir. Tsüngremi ano maneni alima nübertem asoshi pa taküm aser kibong moajangma.

Sd/-
(I. SANEN LONGKUMER)
PRESIDENT, DLST.

Sd/-
(TEMSÜYANGER)
General Secretary, DLST.

DIMAPUR YAONGYIMSEN LONGKUM SAYIR KIDONG


DIMAPUR : NAGALAND

KONANG TETUSHI AGÜTSÜR



Late Er. N.T. Longkumer aser Late Thejano-er jabaso **Wb. ALIAWATI LONGKUMER** (Indian Foreign service) Ministry of external affairs, Government of India-i Democratic People's Republic of Korea (North Korea) nung India Ambassador inyaktsü shimba asoshi Yaongyimsen Longkum Sayir kidong, Kidong Telongjem Dimapur unit, aser Elangtsür Telongjem ajaki konang tetushi tulu agütsür.

Tsüngremi nur kibong aser nü wadang nung maneni len ania moajangma ta sarasademtsür.



DR. LONGERONEN LKR.
(Secretary)
Dimapur Yaongyimsen Longkum Sayir Kidong



S. ALEM LKR.
(President)

Tamil Nadu nung FIH Men's Junior Hockey World Cup asayatsü



Hockey India aser Tamil Nadu Govt na tsüngda FIH Men's Junior World Cup ayongzüka agitsü atema MoU agitepba noksa.

Aami/June 19, 2025

(Agencies): Tamil Nadu nung taküm November 28 nungi December 10 nü tashi FIH Men's Junior Hockey World Cup asayatsü jangjaogo.

Brehostibarnü official sentong ka agiba mapang Hockey India (HI) aser Tamil Nadu sorkar nati iba tongtibang asayamung ya Chennai aser Madurai yimti nung ayongzüka agitsü atema tezüluba nung tenangzüktepba ka yangluogo.

2025 küm iba asayamung ya taoba mapang ama masü tang mezügbuba team 24 asayatsü, koba asayamung puti otsü nung alizüing tasen ka tongtetba asütsü.

Taoba mapang iba asayamung nung team 16 dang asaya liasü aser taküm asayatsü aliba asayamung ya ajak dang tuluba asütsü aser team timba asaya-a title asoshi tali tesashiba

tokteptsü. Iba osang sangdongba mapang asayamung indang official logo-a saya liasü.

Sentong nung o jembiba mapang Tamil Nadu indang Deputy Chief Minister, Thiru Udhayanidhi Stalin-i iba asayamung ayongzüka asayatsü maongka anguba atema kaga nema danga bilemba lemsatsep. "Iba ya state atema dang masü saka linük atema nemadangsü mapang ka lir," ta pai ashi. "Iba amala tetushi international asayamung ka ayongzüka asayaba ajanga jenjang ajak nung iba asaya terenlok nongita yaritsü onok bendanga agütsür aliba sayur. Iba asayamung ya takokba tashi temaba jenjang nung ayongzüka asayatsü atema onoki jenjang agitsü," ta pai ashi.

Paisa, asayamung nung shilem agirtem aser fan tem

nem world-class tajangshiba ka agütsütsü atema Chennai aser Madurai naprongla kanga junga renema lir, ta ashi.

Kasa mapang nung Hockey India tir aser taoba mapang captain Dilip Tirkey-i, iba asayamung ya koda tongtibang iba indang lemsatapa liasü. "FIH Hockey Men's Junior World Cup Tamil Nadu 2025 ya international hockey calendar nung kanga tongtibang asayamung ka lir, kong iba asaya atema tarutsü legends tem anitettsü," ta Tirkey-i ashi.

Paisa, partnership dak temulung asüba lemsatpogo, koba tashishitsü maketba asayamung ka ayongzüka asaya-a international hockey asayamungtem ayongzüka asayartem rongnung India-ia tajungtiba ka kümdaktsütsü nükjidong nung longjemogo, ta ashi.

SAI-i tennis asayartem nem tetuyuba agütsü



Aami/June 19, 2025

(Agencies): Sports Authority of India (SAI)-i, scheme balala ajanga senotsü teyari agizüker aliba India nunger tennis asayartem dang linük tenüing nungi asayatsü atema tongtibangsa jenjang agitsü tetuyuba agütsüba den kuli tejangja makai linük tenüing nungi asayatsü atema marurtem ket nungi senotsü meyipa agitsü, ta ashi.

SAI-isa, TOPS, NSF aser TAGG amala scheme tem nungi teyari agizüker alir asayartem dang Davis Cup, Billie Jean King Cup, Asian Games aser Olympics amala asayamungtem nung linük

tenüing nungi asayatsü atema tebilemba aliba aser azünga aliba indang osang agütsütsü metetdaksüogo.

Maneni SAI-i, Target Asian Games Group nung teyari anguba asayartem dang, senotsü teyari anguba dak linük saisabong nükjidong atema teyari agütsütsü khuret dena lir ta shia shiti ka zülutsü asüngdangogo.

"Temalen shisema aliba asayamungtem ya linük meraket atema tongtibang lir. Anungji item scheme tem ajanga ajangzükbä asayartem ajaki All India Tennis Association-i shimra India tenüing nungi asayatsü atema

ajak toktsür aji mezüing südaktsütsüla," ta tetuyuba nung shia lir.

"NSF-i shimer nai kuli tejangja makai shilem magitsü atema telemtetba agira, tanü tashi nung agüja aliba senotsütem guideline tapet dak ajemdaker meyipa agitsü," ta SAI-isa metetdaksü.

Indian Davis Cup, Billie Jean King Cup team skippers Rohit Rajpal aser Vishal Uppal nati iba tetuyuba ya pelashishia aizükogo aser ashiba agi, iba ajanga linük nung iba asaya renlok aotsü.

"Sorkari asayartem nem khuret angatetdaksüner koba kecha tai mali. Sorkari teyari agütsütsü atema asayartem tenüing bendenlokogo aser linük atema parnok nema shilem agidaksüner," ta Rajpal-i ashi.

"Jenjang kanga tajung agiogo. Linük tenüing nungi asayatsüji ajak dang tetushi tulutiba lir aser sorkar nungi teyari agia lira iba atema kecha sensaksemtüsü mali," ta Uppal-i shisem.

India den mezügbuba Test atema England team sangdongogo

Aami/June 19, 2025

(Agencies): England-i India den mezügbuba Test asaya atema asayartem sangdongogo, koba Hokolbar, June 20 nü nungi tenzüka Headingley, Leeds nung asayatsü.

Iba asayamung ya mezügbuba Tendulkar-Anderson Trophy asütsü aser team anaprongla atema 2025-27 World Test Championship cycle nung mezügbuba asaya asütsü.

December ita sülen asayar tejen Chris Woakes Test team nung tang mezügbuba züingoksemogo aser iba ajanga England team batting aser bowling naprongla tashi itdaktsütsü. Team nungsa Durham pacer Brydon Carse densema lir, shiba tang mezügbuba England nung Test ka asayatsü lir. Pa taoba mapang Pakistan aser New Zealand na nung oa Test pongubo asayaogo.

Ajisüaka ajak dang kanga buluba jembitepba kaji No.3 nung Ollie Pope züingoksema ya lir. Pa den arishi küm 21 tain Jacob Bethell-i iba jenjang asoshi kanga toktepar, saka Pope-i pa jenjang maitsüi lir. Taoba küm New Zealand den asayaba mapang Bethell-i kanga junga asayaogo aser

tawa West Indies den white-ball asayamung nunga pa sempet kanga junga sayuogo. Ajisüaka pai Zimbabwe den Test asayatsü melen Royal Challengers Bengaluru nungi IPL asayatsü shim, kong Pope-i kanga junga asaya-a run 171 yanglua liasü.

India den mezügbuba Test atema England team:

1. Zak Crawley, 2. Ben Duckett, 3. Ollie Pope, 4. Joe Root, 5. Harry Brook, 6. Ben Stokes (capt), 7. Jamie Smith (WK), 8. Chris Woakes, 9. Brydon Carse, 10. Josh Tongue, 11. Shoaib Bashir.

Trent Bridge nung Zimbabwe akokba team nungi asayar ana tang India den asayatsüba team nung mezüingoksem. Yirur alisang Gus Atkinson melen Woakes shimogo aser Carse-i Sam Cook melenogo. Wicketkeeper Jamie Smith-a maneni team nung züingoksemogo.

Kasa mapang nung team captain tasenba Shubman Gill-i anir India team küm 18 sülen tang mezügbuba England nung Test asayamung ka akoktsü merangdar. India team tang temelenshi mapang ka lir aser asayar tasentem aika team nung anioka asayaba angütsü.

Barcelona-i Garcia den küm 6 atema tenangzüktepba yanglu



mapang Garcia-i teyari tulu agütsü aser taoba season top-flight nungi relegate mesüi asayaba nung pai tongtibang shilem agi, aser pai iba division nung goal timtiba (146) kümzüka liasü.

Pa tang tashi nung Spain senior team nungbo khen danga asaya mali, saka arishi küm tatakzük asayaba team balala nungi asayaogo aser taoba küm Olympic team nungi asaya-a gold medal ngua liasü.

Barcelona-i first-choice keeper Marc-Andre ter Stegen den tokteptsüpur anir aruner, shiba taoba season September ita patella tendon raksaba sülen season nung mapang talangbaka masayateti liasü.

Iba sülen arishi küm 35 tain taoba Arsenal goalkeeper Wojciech Szczesny asaya nungi anener aliba meyipa arua pa melen asaya aser tetoktepba ajak senteper asaya 30 nung asaya aser La Liga dena koka liasü, saka pa den tenangzüktepba yangluba June tatemi tembangtsü.

BILEMDANGANG

"Timtem tokrong agi nisung ka tajungba mesüra tamajungba küma melenshidaktsür."